

**Pwyllgor yr Economi,
Masnach a Materion Gwledig**

**Economy, Trade and
Rural Affairs Committee**

Senedd Cymru

Bae Caerdydd, Caerdydd, CF99 1SN
SeneddEconomi@senedd.cymru
senedd.cymru/SeneddEconomi
0300 200 6565

Welsh Parliament

Cardiff Bay, Cardiff, CF99 1SN
SeneddEconomy@senedd.wales
senedd.wales/SeneddEconomy
0300 200 6565

Lesley Griffiths AS

Y Gweinidog Materion Gwledig a Gogledd Cymru, a'r Trefnydd

30 Mawrth 2022

Annwyl Weinidog,

Fframwaith Cyffredin ar Gymorth Amaethyddol

Diolch unwaith eto am ddod i gyfarfod y Pwyllgor ar 17 Mawrth, pan wnaethoch gynorthwyo'r Pwyllgor gyda'i waith craffu cyffredinol ac ateb rhai o'r cwestiynau sydd gennyf am y broses sydd ynghlwm wrth y fframweithiau cyffredin. Mae'r Pwyllgor hefyd yn ddiolchgar am y wybodaeth dechnegol a ddarparwyd gan swyddogion Llywodraeth Cymru mewn sesiwn friffio breifat, ynghylch y fframweithiau y mae'r Pwyllgor wedi'u blaenoriaethu o ran ei waith craffu. Roedd y sesiwn friffio honno yn ddefnyddiol iawn. O ystyried natur gymhleth a thechnegol y fframweithiau, cytunodd yr Aelodau y byddai'n ddefnyddiol ailadrodd y cwestiynau a ofynnwyd ganddynt yn ystod y sesiwn breifat mewn gohebiaeth, a hynny er mwyn sicrhau bod cofnod cyhoeddus yn cael ei gadw o'r cwestiynau a'r ymatebion dan sylw, ac er mwyn hysbysu rhanddeiliaid yn eu cylch. Mae'r cwestiynau wedi'u nodi o dan y penawdau isod, gan gynnwys rhai nas cyrhaeddwyd yn ystod y sesiwn friffio. Rydym yn edrych ymlaen at gael eich ymatebion ysgrifenedig ynghylch yr holl bwyntiau hyn:

Cwmpas y fframwaith

- A wnewch chi gadarnhau beth yw cwmpas y fframwaith ac a fyddai'n gymwys i gynlluniau rheoli tir cynaliadwy?



Gwneud penderfyniadau fel rhan o'r fframwaith

- Mae gan y Grŵp Cydgysylltu Polisi Amaethyddiaeth nifer fawr o gyfrifoldebau mewn perthynas â'r fframwaith. A allwch chi egluro sut y bydd Llywodraeth Cymru yn darparu adnoddau i'r grŵp a sut y bydd yn ei gefnogi, a pha mor aml y bydd y grŵp yn cyfarfod?
- A fydd y Senedd yn cael ei hysbysu pan fydd grwpiau rheoli argyfwng yn cael eu sefydlu ac yn cael gwybod beth yw eu cylch gorchwyl?
- A fydd unrhyw ddata a gwybodaeth y mae Grŵp Monitro'r Farchnad yn eu casglu yn cael eu cyhoeddi neu eu rhannu â'r diwydiant?
- A allwch chi egluro sut y bydd y Grŵp Monitro'r Farchnad yn penderfynu nad yw Marchnad o Brif Bwysigrwydd yn cael ei chyfrif felly bellach, neu ar ba sail y gallai benderfynu y dylai meysydd newydd ddod yn Farchnadoedd o Brif Bwysigrwydd, a sut y byddwch yn hysbysu'r diwydiant am unrhyw benderfyniadau o'r fath?
- A allwch chi egluro pwy yw Grŵp Polisi Marchnad Amaethyddiaeth y DU (UKMAPG) a sut mae'n berthnasol i'r fframwaith?

Rheoli ymwahanu drwy'r fframwaith

- Defnyddir termau gwahanol i ddisgrifio ymwahanu yn y fframwaith. A allwch chi egluro ar ba sail y bydd partion i'r fframwaith yn penderfynu a yw ymwahanu yn 'niweidiol' neu'n 'ddieisiau', neu'n 'angenrheidiol' neu'n 'dderbyniol'?
- A allwch chi egluro sut y bydd ymwahanu rhwng Prydain Fawr a Gogledd Iwerddon yn cael ei reoli drwy'r fframwaith, o ystyried y bydd yn ofynnol i Ogledd Iwerddon ddilyn safonau marchnata'r UE? Pa risgiau, os o gwbl, sy'n gysylltiedig ag ymwahanu oddi wrth Ogledd Iwerddon o ran safonau marchnata?
- A allwch chi egluro sut mae'r fframwaith yn rhyngweithio â Deddf Marchnad Fewnol y DU?
- A yw Llywodraeth Cymru yn bwriadu ceisio eithriad ar gyfer y fframwaith hwn o Ddeddf Marchnad Fewnol y DU?



Datrys anghydfodau

- A fyddai modd i chi egluro a allai'r prosesau datrys anghydfodau arwain at oedi wrth i Lywodraeth Cymru wneud penderfyniadau?
- A allwch chi egluro'r amserlenni ar gyfer datrys anghydfodau?

Yr effaith ymarferol ar gyfraith a pholisi

- A yw Bil Amaethyddiaeth Llywodraeth Cymru wedi mynd drwy unrhyw un o'r prosesau fframwaith cyffredin, neu a fydd hyn yn digwydd? Os felly, beth oedd ymateb y Llywodraethau eraill, ac a wnaed unrhyw newidiadau o ganlyniad?

Tryloywder ac atebolrwydd

- Sut y caiff rhanddeiliaid eu cynnwys yn y strwythurau gwneud penderfyniadau ac adolygu yn y fframwaith?
- A allwch chi egluro beth yw Cynhadledd Ffermio y DU a sut y mae'n berthnasol i'r fframwaith?

Monitro, adolygu a diwygio

- A allwch chi egluro'r amserlenni ar gyfer adolygu'r fframwaith? Pryd fydd hyn yn digwydd yn flynyddol, a phryd y bydd hyn yn trosglwyddo i fod pob tair blynedd?
- A allwch chi nodi pa brosesau fydd yn cael eu rhoi ar waith ar gyfer ymgysylltu â rhanddeiliaid o ran gwneud penderfyniadau, a diwygio ac adolygu'r fframwaith?

Cwestiynau eraill

- Mae'r fframwaith yn cynnwys nifer o wallau, termau heb esboniad a themau anghyson. A allwch chi egluro pam na aethpwyd i'r afael â'r rhain drwy brosesau cymeradwyo mewnol cyn cyhoeddi?
- A allwch chi egluro pryd y bydd y Concordat sy'n gysylltiedig â'r rheoliadau ar y cytundeb ar amaethyddiaeth yn cael ei gyhoeddi?



- A allwch chi egluro sut, os o gwbl, y mae'r fframwaith yn rhyngweithio â'r Cytundeb Masnach a Chydweithredu, a pham ei bod yn ymddangos nad yw rhannau o'r fframwaith wedi'u diweddarau ers cadarnhau'r Cytundeb?
- A allwch chi egluro'r berthynas rhwng y fframwaith a Chorff Cydgysylltu'r DU a grŵp yr Asiantaeth Taliadau Gwledig?

Edrychwn ymlaen at drafod fframweithiau cyffredin gyda chi eto yn y dyfodol agos. Fodd bynnag, yn y cyfamser, rydym am ddiolch i chi ymlaen llaw am ddarparu'r wybodaeth ychwanegol y gofynnir amdani uchod. Byddai ymateb erbyn 29 Ebrill o gymorth i'r Pwyllgor.

Cofion cynnes,



Paul Davies AS

Cadeirydd: Pwyllgor yr Economi, Masnach a Materion Gwledig

Croesewir gohebiaeth yn Gymraeg neu Saesneg | We welcome correspondence in Welsh or English.